

LA USC DI LADINS - VENERDI' 12 FEBBRAIO 2021

La PAT à aproà l bando per l nef Sorastant

Chi che à interess a tor pèrt i cogn se enscinuèr sul portal »Vivoscuola«. L'é temp 30 dis da la publicazion sul Boletin Ofizial de la Region.



La senta de la Scola ladina de Fascia a Sèn Jan.

Con l meis de aost del 2020 se à serà sù l'encèria de Sorastanta portèda dant per 14 egn da la professora Mirella Florian. A sie post l'istà passà l'é stat nominà, con regnèda demò per un an, l sostitut Sorastant te la persona de Claudio Valentini.

Ence Valentini ampò l jirà en penscion con l meis de aost che vegn e la Provinzia autonoma de Trent, con chela de ge arseguèr a la Scola

de Fascia de poder jir inant a na vida stabola e segura, la se à endrezà chest'outa a meter a jir n concurs per dèr sù la direzion de la Scola de Fascia per n temp de 5 egn, che pel vegnir renové demò per n'outa.

Tel bando de concurs, aproà da la Jonta provinzièla te sia scontrèda de en vender ai 5 de firé, l'é stat fat fora che vegne valutà i titoi e fat doi proes de ejam, duta does demò a ousc.

La domana per tor pèrt cogn vegnir fata online dal portal »Vivoscuola« (www.vivoscuola.it) sezion Concors e l'é temp 30 dis dò la data de publicazion sul Boletin de la Region Trentin Sudtirol. Sul medemo portal vegnarà dapò dat duta la informazions sul di e l lech olache vegnarà metù a jir la proes.

Dant de vegnir tout sù l candidat che venc l cognarà fèr n tirocinie de n meis te la Scola de Fascia e n cors de formazion.